

## Schiffahrt ufem Bielersee zum 75-Johr-Jubiläum

Mit em hüttige Tag – em 23. Septämber 2018 – erreicht ds Jubiläumsjohr vo dr Trachtegruppe Lyss e wytere Höhepunkt. D Schiegg Marianne het für us e Schiffahrt ufem Bielersee mit Mittagässe organisiert.

Per Zug oder i Vierergrüppeli mit em Outo, fahre mir uf die 10h45 uf Twann. Für die, wo z frühe si gsy, hets no es Kafi gäh.

Am 11h00 lege mir los. „We dr Sturm dusse wüetet, wes hudlet und tuet“ – wie mir im Lied vom Peter Räber singe – stüret us dr Käptn Oli sicher dür d Gwässer vom Bielersee. Mir löh us vom Wätter nid lo beidrucke, solange d Sunne schynt simer zfride.

Bimne feine Aperero mit Späckzüpfe und Chasselas begrüesst us üsi Presidäntin mit nätte Wort und danket dr Isabelle und em Ueli für die tolli Jubiläumszytschrift, wo pünktlich uf dä hüttig Alass fertig worde isch.

Scho gly übernimmt d Lady Käptn ds Stüür und dr Oli steut sis Schiff vor. Mit viu Witz und Schalk erklärt är us was Backbord (links vom Schiff) und Stüürbord (rächts vom Schiff) isch und wo mir die italienische Schwümmweste mit Name „Schettino“ finde.

Mit dr „Frühdohle“ eröffne mir üse gsellig Alass. Mir fahre am Ligerzer-Chiuchli verbi und links a dr Insu Richenau meint dr Käptn, für lheimischi wärs St. Perters-Insu. Bim verbiga a dr Chuchi hani dörfe ds Gratin probiere. Dr Käptn isch nämlich ou Choch und het ds Menu hie ufem Schiff gchochet. Dir chöit nech fröie, es git öppis feins.

Mir fahre a Erlach verbi i Kanal ine. Chli wyter unge – für die, wos no nid wüsse: gseh mir grad em Kurt sis Euterehus, vis-à-vis vor Anstaut St. Johannsen.

Jetzt giuts ärnst: ds Menu wird särviert. Zur Vorspies gfüllti Teigtäschli, es feins Wysswy-Süppli und jetzt gits e chline Pouse. Zyt für i de Fotoalbum z stöbere, woni im Archiv gfunge ha. A de strahlende Gsichter und de heitere Gschichte, woni ghört ha, isch mini Idee guet acho. Es wird viu glachet, gsunge und ou auti Erinnerung wärde wachgrüeft.

Mit emene Glesli Pinot Noir gömer über zum Houptgang: Longe de Veau (Kalbslende) niedergahret, Bohne, Tomate und es feins Händöpfu-Gratin.

I dr Zwüschezyt heimer Marin erreicht. D Wäue ufem Nöieburgersee haute us ab, wyter ds go. Dr Käptn beschliesst, ds Schiff z wände. Düre Kanal gömer wider zrugge ufe Bielersee. Imene hiube Egge steut är dr Motor ab und loht sis Schiff echli lo schoukle... Zyt fürne troumhafti Dessert-Kreation. D Mehrheit vo de Lüt isch dr Meinig, dass das Menu es 75-Johr-Jubiläum wärt isch. I gloub, ig darf hie im Name vo Aune dr Organisatorin e hätzliche Dank usspräche.

Um die Vieri isch e wunderschöni Schiffahrt mit viele tolle Erläbnis ds Twann z Änd gange.

Angela Engelmann – 25. Septämber 2018